

**Akses perjanjian tenaga hanya untuk MP saja**  
**Malaysiakini.com**  
**June 7, 2011**

Dokumen rahsia perjanjian pembelian tenaga (PPA) yang dimeterai antara Tenaga Nasional Berhad (TNB) dan pengeluar tenaga bebas (IPP) boleh didedahkan kepada ahli Dewan Rakyat, kata Timbalan Menteri Perdagangan Antarabangsa dan Industri, Datuk Mukhriz Mahathir.

Namun menurut beliau butiran perjanjian itu tidak boleh didedahkan kepada orang ramai kerana ia adalah perkara sulit.

"Di parlimen, apabila seseorang MP bertanyakan sesuatu, kita mesti sentiasa telus," kata Mukhriz kepada wartawan semasa sebuah majlis di Kuala Lumpur hari ini.

Beliau ditanya sama ada kerajaan bercadang mendedahkan perjanjian itu berikutan luahan rasa tidak puas hati rakyat dan pelbagai pihak kerana perjanjian PPA itu yang dikatakan berat sebelah.

Mukhriz berkata ahli parlimen adalah perwakilan rakyat dan parlimen adalah tempat yang bersesuaian bagi perkara yang membabitkan kepentingan awam seperti perjanjian PPA dibincangkan.